



DITAME SOBRE O PROXECTO DE DECRETO POLO QUE SE ESTABLECE A ORDENACIÓN E O CURRÍCULO DO BACHARELATO NA COMUNIDADE AUTÓNOMA DE GALICIA.

O pleno do Consello Escolar de Galicia, na súa reunión do día 22 de xuño de 2022, emite o seguinte ditame en relación co proxecto de decreto polo que se establece a ordenación e o currículo do bacharelato na Comunidade Autónoma de Galicia.

- Recomenda á Consellería de Cultura, Educación, Formación Profesional e Universidades a derrogación do Decreto 79/2010 para o plurilingüismo no ensino non universitario de Galicia e a negociación dunha nova normativa para a normalización lingüística no ámbito educativo que garanta o cumprimento da legalidade vixente e que potencie o uso do idioma propio de cara a reverter a situación de perda de alumnado galego falante e permitir que ao rematar a escolarización obrigatoria todo o alumnado teña plena competencia para o uso do galego. Neste sentido, e como primeiro paso, o Consello Escolar de Galicia, recomenda á Consellería de Cultura, Educación, Formación Profesional e Universidades aproveitar a tramitación dos actuais decretos polos que se establecen os currículos educativos, e o do bacharelato en concreto, e eliminar a prohibición de impartir materias do ámbito científico tecnolóxico en galego.
- Insta á Consellería de Cultura, Educación, Formación Profesional e Universidades a negociar coas organizacións sindicais o horario lectivo do profesorado galego, na liña de tornar ós 18 períodos lectivos, co fin de poder aplicar os principios pedagóxicos marcados neste currículo e dotar do persoal necesario aos centros para garantir que os procesos de ensino-aprendizaxe se poidan adaptar aos diferentes ritmos e preferencias do alumnado potenciando así verdadeiras aprendizaxes significativas.
- Recomenda a negociación e aprobación dun plan de redución progresiva das actuais rateos no bacharelato que con 35 alumnas e alumnos por aula, non se garante unha educación de calidade na que se dea cumprimento a todos os aspectos presentes no currículo. O Consello Escolar de Galicia considera como criterio prioritario o establecemento da redución de rateos naquelhas aulas que escolaricen alumnado con necesidades especiais e específicas de apoio educativo.
- Insta á Consellería de Cultura, Educación, Formación Profesional e Universidades a dotar dos medios e recursos necesarios aos centros docentes do noso país, que permitan así garantir agrupamentos flexibles ou desdobramentos de grupos co obxectivo de poder levar a cabo unha atención á diversidade real, e non quede nunha declaración de intencións.
- Recomenda que a Consellería de Cultura, Educación, Formación Profesional e Universidades estude incorporar no artigo 19.2 as expresións "*violencia machista*" e "*vítimas da violencia machista*".



- Propón engadir un terceiro punto no artigo 5 coa seguinte redacción: "A consellería con competencias en materia de educación promoverá un incremento progresivo da oferta de prazas públicas no bacharelato nas súas distintas modalidades e vías".
- Propón a substitución do texto do apartado a) do artigo 7 polo seguinte: "Exercer a cidadanía democrática, desde unha perspectiva global, e adquirir unha conciencia cívica responsable, inspirada polos valores da Constitución española e do Estatuto de autonomía de Galicia, así como polos dereitos humanos, que fomente a corresponsabilidade na construcción dunha sociedade xusta e equitativa e favoreza a sustentabilidade".
- Propón adición de texto no apartado d) do artigo 7, quedando como segue: "Afianzar os hábitos de lectura, estudo, disciplina e traballo en equipo como condicións necesarias para o eficaz aproveitamento da aprendizaxe e como medio de desenvolvemento persoal".
- Propón adición de texto no apartado g) do artigo 7, quedando como segue: "Utilizar con solvencia, responsabilidade e con sentido crítico as tecnoloxías da información e da comunicación".
- Propón adición de texto no apartado j) do artigo 7, quedando como segue: "Comprender os elementos e procedementos fundamentais da investigación e dos métodos científicos. Coñecer e valorar de forma crítica a contribución da ciencia e a tecnoloxía no cambio das condicións de vida, así como afianzar a sensibilidade e o respecto cara ao medio ambiente".
- Propón engadir un novo apartado ao final do artigo 7, coa seguinte redacción: "Valorar, respectar e afianzar o patrimonio material e inmaterial de Galicia, e contribuír á súa conservación e mellora no contexto dun mundo globalizado".
- Para a terceira competencia clave da etapa, primeiro punto do artigo 8, propón a seguinte denominación: "c) Competencia matemática e competencia en ciencia, tecnoloxía e enxeñería".
- Propón adición de texto antes do último parágrafo do punto 4 do artigo 9, coa seguinte redacción: "A Consellería de Cultura, Educación, Formación Profesional e Universidades prestará especial atención aos centros de zonas rurais ou socialmente desfavorecidas, garantindo neses casos que o alumnado non se vexa discriminado e poida escoller calquera materia optativa, aínda cando o número, con carácter xeral, sexa insuficiente".
- Propón engadir o seguinte parágrafo ao final do artigo 10: "Os centros poderán fazer propostas doutras optativas propias, no marco do disposto pola consellería con competencias en materia de educación".
- Propón engadir o seguinte parágrafo ao final do artigo 11: "Os centros poderán fazer propostas doutras optativas propias, no marco do disposto pola consellería con competencias en materia de educación".
- No terceiro punto do artigo 15 propón suprimir o seguinte texto: "ou ampliación do calendario escolar ou do horario lectivo de materias".
- Propón adición de texto no cuarto punto do artigo 17, quedando como segue: "A Consellería con competencias en materia de educación dotará aos centros do material necesario para o



uso das tecnoloxías da información e da comunicación, e formará ao profesorado no uso dos mesmos e na elaboración e no seguimento das programacións didácticas".

- Ao final do parágrafo do primeiro punto do artigo 18 propón engadir o seguinte texto: "Así mesmo, prestarse especial atención á orientación educativa e profesional do alumnado incorporando a perspectiva de xénero".
- Ao final do segundo punto do artigo 20 propón engadir o seguinte texto: "A consellería con competencias en materia de educación regulará o reforzo e recoñecemento da función titorial cunha redución horaria do profesorado que exerza estas funcións".
- Propón adición de texto no cuarto punto do artigo 20, quedando como segue: "Os centros docentes deberán informar e orientar o alumnado co fin de que a elección das modalidades, as vías e as materias ás que se refiren os artigos 9, 10 e 11 sexa a más adecuada para os seus intereses e a súa orientación formativa e/ou profesional posterior, evitando condicionamentos derivados de estereotipos de xénero".
- Propón adición de texto no segundo parágrafo do terceiro punto do artigo 21, quedando a primeira frase como segue: "Entre estas medidas estarán a redución das rateos e as de apoio educativo para o alumnado con dificultades específicas de aprendizaxe".
- No anexo III (continuidade entre materias de bacharelato) propón engadir as materias "Tecnoloxías da Información e da Comunicación I" e "Tecnoloxías da Información e da Comunicación II".

Santiago de Compostela, 27 de xuño de 2022

O secretario

Xosé María López Carretero



Visto e prace

O vicepresidente

Fernando del Pozo Andrés

